



Kalaallit Nunaanni aalisarnermi pisarineqartut isumalluutini atuinermut akitsuutaat pillugit Inatsisartut inatsisaata allanngortinneqarneranik Inatsisartut inatsisissaattut siunnersut.

(Aningaasaqarnermut Nunamullu Namminermut Naalakkersuisoq)
(Siullermeernera)

Siunnersuutip uuma qulequtaa takugakku nuannaaleraluarpunga, atualeriarakkuli, ingerlaannaq pakatserujussuarpunga.

Isertugaataangilaq, Demokraatit sinerissamut qanittumi qaleralinniarnermi isumalluutini atuinermut akitsuusiinissamut akertiummata. Naalakkersuisoqatigiisimasulli Siumut, IA aamma Naleraq aalisartut isumalluutini atuinermut akitsuuserneqarnissaat piumasarisimavaat. Tamanna Inatsisartut Ukiakkut katersuunneranni 2017-imi pivoq.

Taakku partiit silatunerulersimapput taakkulu partiit pingasut upernaanerani qineqqusaarnermi neriorsuipput, akitsuut taanna peerneqassasoq. Taamaattumik isumaqarnarpoq, pisariitsumik siunnersuuteqartoqarnissaa, taassuma akitsuutik peernissaanik, sunali peqqutigisimanerlugu IA tassunga qineqqusaarnermi neriorsuutini eqqortingilaa, assorsuaq eqqumiiginartitatsinnik.

Ajoraluartumik siunnersuuteqarneq isumalluutini atuinermut akitsuutip peerneqarnissaanut tunngassuteqangilaq. Akerlianilli atorfillit pissaaneqarpallaarnerisa annertusiniarnerannik peqquteqarluni aalisartullu pappilissanik uppersaatissanik nassiussuinissaannik piumasaqarlutik soorlu ilaatigut taamungaannaq tigooqqaalluni misiliinertut. Piffissaajaataannartut tamanna isigisassaavoq, atorfillillu pissaaneqarnerunerannik kinguneqartussaalluni, allaffissornerulernermik taamatullu allaffissornermut aningaasartuuteqarnerulernermik. Uagut Demokraatit tungaanniit tamanna kissaatiginngilarput.

Akerlianilli annikinnerusunik, sulilluarnerusumik pisariinnerusumillu allaffissorneq piumanerullugu. Taamaattumik siunnersuut una allarluinnarmut saatitsivoq.

Taamatut isumaqarluta siunnersuutip itigartinneqarnissaa innersuussutigaarput.